

ولا حدش يأخذها .. علشان أؤكد كلمت البدل ، وعملت حجتي لأنه  
جديد في البلد ولا يعرفش حد ، وسألته :  
- عندكش جوابات لسه ما وزعتهاش ؟

- فيه جوابين ثلاثة . لكن ما تخافشى . أنا روقت لك الشغل  
تمام . حتى واحدة أظن اسمها أم أحمد كان لها جوابين رجعتهم  
للموم ، علشان ناس قالوا لي إنها ماتت .

بعد كده جه جواب تاني من خليل . فتجته . إيه الحكاية ؟  
ما بتردش عليه ليه ؟ هو زعلان من زعلها . ما لهاش حق تزعل  
ما دام فهمها علته . وجواب تاني بعد ده بعشرة أيام تقريباً .  
لسه زعلانة ؟ إذا كان فيه حاجة مزعلاها لازم تقولها له . وهو بس  
ح يكتب لها جوابات على فشوش وحاجة زي دي ! وبعد كده سكت  
خرس . ولا جواب تاني جه منه بعد كده .

الجوابات دي كلها بقيت أخذها . ما أرجعهاش للموم .  
وإيه الفائدة ! وكنت باعمل كده في جوابات جميلة . كل يومين  
والثاني يرمى في الصندوق جواب منها . جوابها رخرة اللي راحت  
مدة غيابي ع الفجالة ، طبعاً لسه ملتححة في الشباك هناك . ما حدش  
يياخذهم » .

وتاهت نظرة عباس وتصلب وجهه ، وسمرت عيناه على مرمي  
بعيد . ليس في وجهه أثر للروح الخفيفة المرتعبة الهائجة . تمثال  
من البرونز ، يقصد صانعه إبراز قسوة اللحم ، وصلابة خطوط